



Naunaipkutaq Titiraq

Havauhikhait Maligaliuqtit Maligaliurvingmi

Nunavunmi MLA-nguyut taapkua 19-nguyut niruaqtauvaktut kivgaqtuqhugit nunaqaqatainik Maligaliurvingmi. MLA taapkua qaffinik munaqtakhalgit havaakhanik Nunavunmi maligaliuqtiublutik.

Kivgaqtiublutik maligaliuqtiubluglu, Maligaliuqtiuyut taapkua ihumaaluutauyunik nunaqaqatimingnit tuhaqtittivaktut, ihariagiyainik nunaqaqataita pinahuaqhutik ikayurahuaqhutiglu ihumaliuqhutik qanuq havauhiqarniariakhait kavamatkut Nunavunmiut ihumaaluutainik.

MLA-nguyut havauhiqaqtut akhuuqtauyumik “tuhaqti/ikayuqtimik” ikayuqhugit nunaqaqataita ihuigiyamingnik pitquhimayainiglu naunaipkutinin kavamanit.

Havauhikhaita MLA-nguyut katitaulaaqtut havaalluannginut:

Maligaliurviup Iluani

- Ilaublutik aullaqtitautillugu Maligaliurvik;
- Uqauhiinik tuhaqtittiblutik Maligaliurvingmi ihumaaluutigiyainik nunaqaqatait, nunallaamingnik nunaqaqatimingnigluunniit;
- Uqauhiinik tuhaqtittiblutik Maligaliurvingmi ihumaaluutigiyainik Nunavunmi atauhiubluni;
- Apiqhuiblutik uqauhikkut titirakkullu Ministanut kivgaqtuttiariakhainik kavamatkut;
- Tuhaqtittiblutik ihumainik niruaqtaqhutiglu pigiaqtitauhimayunik;

- Ihivriuttiaqhugit niruaqhutiglu Piquyakhanik, kiinauyanik atuqtakhanik nanminiqarnikkullu havaakhait kavamatkut; imaalu
- Tukhirautiniglu nunaqaqatimingnit takupkaqtittivaktut.

Katimayiralaanit Maligaliurvingmilu

- Katimayiublutik Katimayiralaanut Katimayiralaanguqtuniglu talvunga Maligaliurvingmut;
- Ilauvakhutik katimatillugit Katimayiralaat, naalaktittiblutiglu katimatillugit Piquyanut ahiniglu ihumaaluutainik; imaalu
- Ilauvakhutiglu katimatillugit Tamatkiumablutik Maligaliuqtit taapkualu Maligaliuqtiinnait Katimatillugit.

Nunaqaqatigiingnit

- Katimaqatigilugit nunaqaqatimingnik ihumaaluutait tuharlugit;
- Katimaqatigiblugit nunallaanit hivuliqtit katimaqatigiillu ihumaaluutigiyainit nunaqaqatimingnit;
- Katimaqatauvagluni uqaqtiuvaglunilu nunallaanit hulyuqaraangat; imaalu
- Tuhaqtittihimavaglutik nunaqaqatait hulivagiakhainik kivgaqtuibluni MLA-tut naalapakhugitlu nunaqaqatait katimapkaigaangamik tuhaqtittivaglunilu naalautikkut.

Havagvianit

- Ihivriuqhiblutik parnaiyaiblutiglu titiqqanik;
- Katimaqatigiblugit ahiit MLA-nguyut, havaktit, nunaqaqatiit ahiillu;
- Apiqhuqtauvakhutiglu tuhaqtittiyitkut;
- Ihivriuqhugit makpiraat *Katimadjutinik*; imaalu
- Qauhimanahuaqhimablutiglu naunaipkutanik taiguaqhutik, tuhaayakhanit, ahiniglu titiqqanik.

Taamna Uqaqti, havaktiubluni Maligaliurvingmi, aulayuittukhaq nibliqtailivaglunilu. Taimaa, taamna Uqaqti apiqhuyukhaunngittuq Ministanit unipkaalaittunilu Maligaliurvingmi. Kihimi, taamna Uqaqti MLA-nguyuuq huli nunaqaqatimingnik katimaqatigiinnarialik Ministanik ihumaaluutainut.

Taamna Hivuliqti Ministailu MLA-nguyut, kihimi kavamauvaktut ubluugaangat. Maligaliurvingmut ilaublutik, atauttikkuq munaqtiuvaktut maligakhaliuqhimayunut kavamanit. Taapkua Ministauyut, ilaaninguraangat, uqaliqpaktut ilikkuuqhutik, kamahuktittihimaittumik kavamatkut havaanganik ilagigamitku.

MLA-nguyut kavamanut ilaunngittutut ihumagiyauvaktut. MLA-ngublutik, munaqhiyaqaqtut tuhaqtittiblutik kavamatkut havaanginik apiqhuivakhutiglu kavamanik maligakhainut hulihimayainullu.